



Selebriti bantu belia

Najiy Jefri

najiy.jefri@hmetro.com.my



NORMAN bersama wakil Kolej SEGi dan CyberSecurity Malaysia selepas sidang media pengumuman Rakan Strategik Siri 2 Program Kita Jaga Kita di Kolej SEGi Subang Jaya.

PROGRAM Kita Jaga Kita anjuran Yayasan KRU mendapat sokongan selebriti tanah air untuk membantu belia dari keluarga B40 dalam mempromosikan produk mereka.

Presiden Ahli Lembaga Pemegang Amanah Yayasan KRU, Datuk Norman Abdul Halim berkata, seramai 23 selebriti sudah mendaftar sebagai sukarelawan program terbabit.

"Tugas mereka adalah untuk menghebahkan program ini serta membantu mempromosikan produk usahawan terbabit di medial sosial masing-masing.

"Sebagai permulaan inisiatif ini dilakukan secara percuma. Tapi, sebaik produk yang dijual mendapat sambutan, mungkin selebriti berkenaan boleh mempertimbangkan untuk meletakkan bayaran ke atas khidmat mereka selepas itu.

"Di sini, saya amat berbesar hati dan mengalu-alukan kehadiran lebih ramai selebriti untuk menjadi sukarelawan dalam program ini bagi membantu pertumbuhan ekonomi usahawan muda yang ingin berjaya," katanya.

Antara selebriti yang terbabit termasuk Zamani, Linda Rafar, Adam, Kumpulan VIP, Mior Zulkarnain, Dian Hashim, Fai Ramli, DJ Fateh, Timur, Winnie K, Denes Kumar dan Balan Kash.

Pada masa sama, program Kita Jaga Kita yang dilancarkan pada 1 Jun lalu mempunyai misi dan visi melahirkan 100 usahawan digital daripada golongan belia menerusi program latihan e-dagang serta modul yang disediakan.

Bagaimanapun Norman berkata, jumlah itu kemungkinan bertambah bergantung kepada sokongan serta kerjasama yang mereka terima menerusi pelbagai kerjasama strategik yang bakal diumumkan kelak.

"Objektif utama Yayasan KRU adalah membantu belia dari keluarga B40 untuk berjaya dalam bidang perniagaan berteraskan penggunaan platform digital dan kandungan kreatif bagi penjenamaan.

"Melalui program latihan kami dan sokongan daripada rakan strategik, diharapkan lebih ramai usahawan muda akan mendapat manfaat dan bimbingan daripada mentor.



NORMAN (kiri) menyampaikan cenderamata kepada Ketua Pegawai Eksekutif CyberSecurity Malaysia Datuk Dr Amirudin Abdul Wahab.

"Bagi yang terpilih, mereka akan mempelajari pelbagai ilmu berkaitan perniagaan dalam talian seperti penstriman langsung, suntingan video, sesi perkongsian

maklumat dengan pakar serta perlbagai ilmu yang berkaitan," katanya pada sidang media pengumuman Rakan Strategik Siri 2 Program Kita Jaga Kita di Kolej SEGi Subang Jaya.

Rakan Strategik untuk siri kedua ini membabitkan Kolej SEGi dan CyberSecurity Malaysia.

Pada majlis itu, Norman turut berkongsi bentuk kolaborasi yang dijalankan Yayasan KRU bersama dua rakan strategiknya itu.

"Bersama Kolej SEGi, kerjasama yang dilaksanakan adalah dengan memperkenalkan program Masterclass Profesional Kusahawanan Digital.

"Apa yang menarik, tawaran biasiswa untuk 10 pelatih bernilai RM100,000 bakal diberikan. Ia pastinya dapat menarik minat graduan insititusi pengajian tinggi awam atau swasta, pekerja profesional dan usahawan muda.

"Program latihan ini bermula pada Januari tahun depan dan dijalankan secara hibrid iaitu virtual dan kelas fizikal.

"Pihak Cybersecurity Malaysia pula menyediakan program latihan kemahiran berkaitan aspek keselamatan siber meliputi kesedaran dan kepentingannya serta kusahawanan siber atau 'Cyberpreneur' kepada 30 peserta saja," katanya.

Turut menjalankan kerjasama dengan Yayasan KRU adalah Akademi Seni Budaya dan Warisan Kebangsaan (Aswara), Infrastructuire University Kuala Lumpur (IUKL), Kolej Universiti Islam Antarabangsa Selangor (Kuis), Kolej Universiti Islam Pahang (UCYP), KRU Academy, Universiti Kebangsaan Malaysia (UKM), Universiti Malaya (UM), Universiti Malaysia Kelantan (UMK) dan Universiti Malaysia Pahang (UMP).

Tidak ketinggalan juga, Universiti Malaysia Perlis (Unimap), Universiti Malaysia Sabah (UMS), Universiti Malaysia Terengganu (UMT), Universiti Multimedia Melaka, Universiti Pendidikan Sultan Idris (UPSI), Universiti Pertahanan Nasional Malaysia (UPNM), Universiti Putra Malaysia (UPM), Universiti tun Hussein Onn Malaysia (UTHM) dan Universiti Tunku Abdul Rahman (Utar).

Disiarkan pada: November 7, 2021 @ 6:31am